

दिनांक 29.06.2025

समय: 18.45 बजे

- प्रधानमंत्री नरेन्द्र मोदी आकाशवाणी ऊं आज प्रसारित करी ज्या मन की बात कार्यक्रम मांय कह्यो-देश री 64 फीसदी ऊं बत्ती आबादी ने सामाजिक सुरक्षा योजनावां रो फायदो मिल रह्यो है।
- प्रधानमंत्री भारत मांय ट्रेकोमा बीमारी जड़ ऊं खत्म व्हेवण रा विश्व स्वास्थ्य संगठन रा ऐलाण रो श्रेय स्वच्छ भारत मिशन अर जल जीवन मिशन ने दीनो।
- मुख्यमंत्री भजन लाल शर्मा प्रदेश रा विकास अर नीतिगत फैसलां मांय सांख्यिकी विभाग रा काम री सराहवणा कीनी-19 वा सांख्यिकी दिवस जळसा मांय सिरकत कीनी।
- प्रदेश मांय चौमासा री बिरखा जारी – 2 ऊं 6 जुलाई बीचे जयपुर, भरतपुर, कोटा अर उदयपुर संभाग मांय कठे-कठे भारी बारिश रा आसार।

000

प्रधानमंत्री नरेन्द्र मोदी कह्यो है के स्वास्थ्य ऊं ले र सामाजिक हिफाजत ताई हर हलका मांय देश तेजी ऊं आगे बध रह्यो है। आज आकाशवाणी ऊं प्रसारित करी ज्या खास कार्यक्रम मन की बात मांय श्री मोदी कह्यो के आज देश की जनता ने सामाजिक हिफाजत ऊं जुड़ी भांत-भांत री योजनावां रो फायदो मिल रह्यो है। वे अंतर्राष्ट्रीय श्रम संगठन री एक रपट रो जिक ई कीनो, जिण रे मुजब देश री 64 फीसदी ऊं बत्ती आबादी ने सामाजिक हिफाजत री किण ई न किण ई योजना रो फायदो मिल रह्यो है।

श्री मोदी विश्व स्वास्थ्य संगठन री वां रपट रो ई जिक कीनो जिण मांय भारत मांय आंख्यां री बीमारी ट्रेकोमा रे जड़ ऊं खत्म व्हे जावण रो ऐलाण करी ज्यो है।

प्रधानमंत्री साल 1975 मांय लगायी ज्या आपातकाल रो जिक करता थकां कह्यो के देश माथे इमरजेंसी थोपी जावण रा 50 साल कुछ दिन पैली ही पूरा व्हा है अर देशवासी 'संविधान हत्या दिवस' मनायो है। श्री मोदी कह्यो इमरजेंसी रो डट र मुकाबलो करण वाळा सगळा लोगां ने याद करणा चाहिजे। वे कह्यो के इण ऊं संविधान ने मजबूत बणायो राखण सारू लगातार सावचेत रेहवण री सीख मिले है। मन की बात मांय प्रधानमंत्री कह्यो के 21 जून ने मनायी ज्या अंतर्राष्ट्रीय योग दिवस रे मौके राखी ज्या कार्यक्रम मांय दुनियाभर मांय करोड़ों लोग सिरकत कीनी। श्री मोदी कैलाश मानसरोवर यात्रा, अमरनाथ यात्रा अर जगन्नाथ रथ यात्रा री ई चर्चा कीनी। वे कह्यो के अ यात्रावां पूरा देश मांय एक भारत श्रेष्ठ भारत रा भाव रो दरसाव करे है। श्री मोदी कह्यो के धार्मिक यात्रावां सेवा रा मौकां रो महाअनुष्ठान ई व्हे है। श्री मोदी हाल ही अंतर्राष्ट्रीय अंतरिक्ष केंद्र ऊं जुड़्या भारत रा गुप कैप्टन शुभांशु शुक्ला रो ई जिक कीनो।

प्रदेश मांय ई प्रधानमंत्री रा मन की बात कार्यक्रम ऊं जुड़्यो उमाव निजर आयो। मुख्यमंत्री भजन लाल शर्मा वां रा रहवास माथे ओ कार्यक्रम सुण्यो। वे कह्यो के प्रधानमंत्री री अगुवाई मांय देश तेजी ऊं आगे बध रह्यो है। पाली मांय भारतीय जनता पार्टी रा जिला मुख्यालय मांय ई मन की बात कार्यक्रम सुणी ज्यो।

000

लोकसभा अध्यक्ष ओम बिरला रो काल हिमाचल प्रदेश मांय धर्मशाला रा तपोवन मांय राष्ट्रमंडल संसदीय संघ-सीपीए संघ रा जोन-2 रा सालाना सम्मेलन रो उद्घाटन करण रो कार्यक्रम है। ई जोन मांय दिल्ली, हरियाणा, हिमाचल प्रदेश, जम्मू-कश्मीर अर पंजाब शामिल है। ई सम्मेलन रो मकसद

समकालीन समय मांय लोकतांत्रिक संस्थानां ने मजबूत बणावणो, काम करण रा बेहतर तरीका साझा करणा अर राज-काज सारू नुवा तरीका री तलाष करण ऊं जुड्यो मंच मुहैया करावणो है। ई सम्मेलन रो मुद्दो-डिजिटल युग में सुशासन : संसाधनों का प्रबंधन, लोकतंत्र की रक्षा और नवाचार को अपनाना है।

000

उत्तराखंड रा उत्तरकाशी जिला मांय **सिलाई बैंड** कने आज तड़के बादळा फाट जावण रे कारण व्ह्या हादसा मांय कमटाणा माथे काम कर रह्या नौ मजूर गम गया। कमटाणा माथे 19 मजदूर काम कर रह्या हा ज्या मांय ऊं दस ने बचा लिया ज्या। मौका माथे एन.डी.आर.एफ, एस.डी.आर.एफ. अर पुलिस री टोलियां राहत अर बचाव रा काम चला री है। बारिश रे कारण गंगोत्री अर यमुनोत्री रा गेला ई बन्द है। लगातार व्हे रही बिरखा बीचे जमी धंस जावण री शंका ने ध्यान राखता थकां चारधाम यात्रा ई एहतियातन एक दिन सारू टाळ दीरीजी है।

000

आज 19 वों सांख्यिकी दिवस मनायी ज्यो। सांख्यिकी अर आर्थिक आयोजना री नामी हस्ती प्रोफेसर पी. सी. महलानोबिस री याद मांय ओ दिन मनायो जावे है। ई साल रा सांख्यिकी दिवस रो मुद्दो है- **राष्ट्रीय प्रतिदर्श सर्वेक्षण के 75 वर्ष**। ई मौके दिल्ली मांय राख्यी ज्या कार्यक्रम मांय सांख्यिकी अर कार्यक्रम क्रियान्वयन मंत्री राव इन्द्रजीत सिंह कह्यो के आज रा डेटा-आधारित जमाना मांय सांख्यिकी शासन री बुनियाद है। प्रदेश मांय ई सांख्यिकी दिवस रे मौके न्यारा-न्यारा कार्यक्रम राख्यी ज्या। जयपुर मांय राख्यी ज्या राज्य स्तर रा कार्यक्रम मांय राज्यपाल हरिभाऊ बागडे कह्यो के सूचना अर संचार प्रौद्योगिकी रा मौजूदा दौर मांय सांख्यिकी रो महत्त्व तेजी ऊं बध रह्यो है। वे कह्यो के साल 2047 ताई भारत ने विकसित देश बणावण रो लक्ष्य भरोसेमंद, समावेशी अर रियल टाइम आँकड़ा व्हेवण रे पाण ई साकार व्हे सकेला। कार्यक्रम मांय मौजूद मुख्यमंत्री भजन लाल शर्मा कह्यो के राज्य सरकार आंकड़ां रा आधार ऊं नीतिगत फैसला ले र सुशासन री मजबूत बुनियाद रखी है। वे कह्यो के सरकार प्रदेश मांय सांख्यिकी तंत्र ने मजबूत बणावण री दिशा मांय खास फैसला ले रही है।

कार्यक्रम रे दौरान सांख्यिकी हलका मांय बेहतरीन काम करण वाळा जयपुर रा जिला कलेक्टर समेत 16 अहलकारां अर कर्मचारियां रो मान करी ज्यो। झुन्झुनू जिलो लगातार विकास रा लक्ष्य 2024 रा सगळा 17 बिन्दुआं माथे बेहतर काम करता थकां प्रदेश मांय अब्ल रह्यो। 19 वां सांख्यिकी दिवस रे मौके जारी आंकड़ां मांय ई उपलब्धि री जाणकारी मिली। सांख्यिकी दिवस रे मौके झुन्झुनू जिला मुख्यालय माथे **राष्ट्रीय प्रतिदर्श सर्वेक्षण के 75 वर्ष** मुद्दा माथे संगोष्ठी राख्यी ज्यी। ई पाछे विधायक राजेन्द्र भाम्बू कह्यो के सतत विकास लक्ष्य मांय झुन्झुनू जिलो अब्ल रहवणो प्रशासन रे मुस्तैदी ऊं काम करण ने साबित करे है।

000

प्रदेश मांय व्हे रही चौमासा री बिरखा बीचे आज श्रीगंगानगर मांय दोपहरां पाछे जोरदार बायरो बाजण सागे मेह व्ह्यो। भरतपुर अर डीग मांय ई दोपहरां पाछे तेज बारिश व्ही। उदयपुर, जालौर अर सिरौही मांय ई आज जोरदार मेह बरस्यो। राजधानी जयपुर मांय ई हल्की बिरखा व्ही। कोटपूतली-बहरोड़ हलका री फौजावाली ढाणी मांय बीजळी पड़ जावण ऊं एक जणा री मौत व्हे ग्यी। टोंक जिला रा देवली मांय दोस्तां सागे गोठ मणावण गया जयपुर जिला रा कालाडेर रा रहवासी एक जणा री बनाव नदी मांय डूब जावण ऊं मौत व्हे ग्यी। मौसम केन्द्र जयपुर रे मुजब काल कोटा, उदयपुर, भरतपुर, अजमेर अर जयपुर संभाग मांय बिरखा रा आसार है। जोधपुर अर बीकानेर संभाग मांय ई बारिश रा आसार है। महकमो जयपुर, भरतपुर, कोटा अर उदयपुर संभाग मांय 2 ऊं 6 जुलाई बीचे कठे-कठे भारी बारिश अर कठे-कठे घणी भारी बारिश री संभावना जतायी है।

विधानसभा अध्यक्ष वासुदेव देवनानी आज भीलवाड़ा रा हरीसेवा उदासीन आश्रम मांय राख्यी ज्या धार्मिक कार्यक्रम मांय सिरकत कीनी। ई मौके श्री देवनानी कह्यो के विधानसभा रो काम डिजिटल तरीका ऊं व्हेवण रो सगळा ने फायदो मिल रह्यो है। वे कह्यो के इण ऊं रूप्यां री बचत सागे ई पर्यावरण ने बचावण मांय ई मदद मिल रही है।